



**BARAZA LA WAWAKILISHI – ZANZIBAR**

**ORODHA YA SHUGHULI ZA LEO**

**BARAZA LA TISA LA WAWAKILISHI**

**MKUTANO WA SITA**

**Kikao cha Thelathini – Tarehe 19 Juni, 2017.**

Kikao Kitaanza Saa 3.00 (Tatu) Asubuhi  
na Dua itasomwa.

**I. TAARIFA YA SPIKA**

**II. MASWALI:**

**Wizara ya Elimu na Mafunzo ya Amali:**

176. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Elimu na Mafunzo ya Amali:

Zanzibar imepiga hatua kiasi katika maendeleo ya elimu kwa watu wenye ulemavu, na hivi karibuni kumekuwa na mpango wa kujumuisha wenzetu wenye ulemavu katika skuli za kawaida.

- (a) Je, kuna skuli ngapi za Elimu Mjumuisho kwa Unguja na Pemba.
- (b) Je, ni vipi Serikali inazipa msaada skuli hizi kwa upande wa wataalamu, vifaa na mbinu za usomeshaji.

184. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Elimu na Mafunzo ya Amali:

Uandikishwaji wa wanafunzi wanaoanza darasa la kwanza umekuwa ukiongezeka kila mwaka lakini ongezeko hilo haliendani na uimarishwaji wa miundombinu ya madarasa ya kuwaweka watoto hao. Zipo skuli ambazo darasa moja lina wanafunzi mia moja na zaidi hali ambayo haileti matokeo bora katika ufundishaji.

Je, Serikali imejipangaje kuhakikisha kuwa ongezeko la uandikishaji linakwenda sambamba na kuimarisha miundombinu ya kusomea kama madarasa.

**Wizara ya Fedha na Mipango:**

40. MHESHIMIWA ABDALLA MAULID DIWANI (Jimbo la Jang’ombe) – Atamuuliza Mheshimiwa Waziri wa Fedha na Mipango:

Pamoja na kuipongeza SMZ kwa kutatua shida za wananchi wakati wa kipindi cha mvua na kupelekea kuchimbwa mitaro mikubwa sehemu mbalimbali za Manispaa ya Mji wa Zanzibar, ili kuondoa tatizo la kutuama kwa maji na kuhatarisha shughuli mbalimbali za wananchi katika maeneo yao.

- (a) Je, Serikali inatoa tamko gani kwa wakaazi wa Jang’ombe Urusi ambao nyumba zao zimependekezwa kuvunjwa na zimeshawekwa alama za X.
- (b) Ni lini kazi ya kuvunjwa nyumba hizo itaanza na wakaazi hao kulipwa fidia ya nyumba zao.

182. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Fedha na Mipango:

Kumekuwa na taarifa kuwa Serikali inataka kuanzisha mpango wa kuvitoza kodi vyuo vya Qur an, wananchi

wamekuwa na shauku kutaka kujuwa ukweli wa mpango huo.

Je, mpango huo upo kweli na kama upo, jambo gani limezingatiwa katika kutoza kodi vyuo vya Qur an ambavyo siyo sehemu za biashara.

**Wizara ya Afya:**

52. MHESHIMIWA SIMAI MOHAMED SAID (Jimbo la Tunguu) - Atamuuliza Mheshimiwa Waziri wa Afya:

Ni lini Hospitali ya Binguni katika Wilaya ya Kati, Jimbo la Tunguu itajengwa.

**Wizara ya Habari, Utalii, Utamaduni na Michezo:**

91. MHESHIMIWA JAKU HASHIM AYOUB (Jimbo la Paje) – Atamuuliza Mheshimiwa Waziri wa Habari, Utalii, Utamaduni na Michezo:

Kiwanja cha mpira wa miguu cha Kitogani kilianza ujenzi wake kwa kasi kubwa na kudhaniwa kuwa kingemaliza kwa haraka. Hata hivyo, ujenzi huo hivi sasa umedorora huku wapenzi wa mpira wa miguu wa Mkoa wa Kusini wakisubiri kwa hamu kumalizika ujenzi wa kiwanja hicho kwa vile kitakuwa cha aina yake.

- (a) Je, ni sababu gani zilizopelekea ujenzi huo kudorora
- (b) Je, Serikali ina mpango gani kuhakikisha kuwa ujenzi huo unaendelea na kiwanja hicho cha aina yake kinamalizika.

**Wizara ya Ardhi, Maji, Nishati na Mazingira:**

158. MHESHIMIWA SULEIMAN SARAHAN SAID (Jimbo la Chake Chake) - Atamuuliza Mheshimiwa Waziri wa Ardhi, Maji, Nishati na Mazingira:

Serikali ya Mapinduzi ya Zanzibar imejitahidi kuweka mipango miji na vijiji katika sekta tofauti za maendeleo katika kwenda na kasi ya maendeleo kama utalii, viwanda na kadhalika. Lakini Zanzibar ni ndogo kwa ardhi yake na ni kubwa kwa ukuaji wa idadi ya wananchi wake. Lipo neno lenye maana kubwa na nzuri sana ya matumizi bora ya ardhi lakini neno hili ni kama nyimbo sio kitendo kwani sioni kama linatekelezwa.

- (a) Je, Serikali hailijui suala la ardhi ya Zanzibar kuwa ni ndogo na haiongezeki lakini watumiaji wanaongezeka.
- (b) Je, Serikali ina kipimo gani cha ukubwa kwa ardhi ya matumizi, kwa ajili ya mahoteli, viwanda, villa, nyumba za kuishi au kila mmoja anavuta kamba atakapo tu.
- (c) Je, Sheria ipo kama ipo mbona haitumiki au kama haipo mbona haitungwi ili kuinusuru Zanzibar na watu wake kutokana na wajanja wachache wanaojichukulia maeneo makubwa bila kiasi.

**Wizara ya Kilimo, Maliasili, Mifugo na Uvuvi:**

17. MHESHIMIWA HIDAYA ALI MAKAME (Nafasi za Wanawake) - Atamuuliza Mheshimiwa Waziri wa Kilimo, Maliasili, Mifugo na Uvuvi:

Mashamba ya minazi yaliyopo maeneo ya Kijichi, Kizimbani Paidoc na Kizimbani kwenye shamba la mikarafuu yana minazi ya asili ambayo imeshaleta manufaa makubwa kwa Serikali na kwa wananchi kwa ujumla, lakini minazi hiyo kwa sasa hadhi na ubora wake wa kuzaa umepotea kwa sababu ya kutoshughulikiwa.

- (a) Je, Serikali ina mpango gani wa kuatika mbegu za minazi mirefu kama ile iliyomo kwenye shamba la minazi paidoc, ili uhalisia na ubora wa shamba lile usipotee.
- (b) Wizara inachukua hatua gani kuona kwamba minazi iliyopo Kijichi na kwenye shamba la mikarafuu Kizimbani inafanyiwa upaliliaji makini ili iweze kuzaa kama minazi mengine ya kawaida.

180. MHESHIMIWA JAKU HASHIM AYOUB (Jimbo la Paje) – Atamuuliza Mheshimiwa Waziri wa Kilimo, Mifugo, Maliasili na Uvuvi:

Kumekuwa na malalamiko kutoka Jumuiya wa Wachimba Mchanga kuwa kodi ya kuchimba rasilimali hiyo imekuwa kubwa na wao kushindwa kumudu gharama zake.

Je, kwanini Serikali imepandisha kodi ya uchimbaji wa mchanga ambayo inawaumiza wananchi wanyonge.

**Wizara ya Ujenzi, Mawasiliano na Usafirishaji:**

59. MHESHIMIWA SIMAI MOHAMED SAID (Jimbo la Tunguu) - Atamuuliza Mheshimiwa Waziri wa Ujenzi, Mawasiliano na Usafirishaji:

Kwa kuwa wapo wananchi wamejenga katika maeneo ya barabara kutoka makutano ya Barabara ya Tunguu (Junction) na kuelekea Kaebona.

Je, Serikali imepanga kuwafidia vipi siku za usoni, wananchi wa Kibele na Bungi wakati itakapopanga mpango wa kupanua barabara.

170. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Ujenzi, Mawasiliano na Usafirishaji:

Hivi karibuni Zanzibar kumezuka usafiri wa bodaboda katika maeneo mbali mbali ya Wilaya ya Mjini,

ambapo sio jambo baya kwa vile vijana wetu wengi wanapata kujiajiri. Hata hivyo, imeonekana hakuna udhibiti wa shughuli za bodaboda Zanzibar kama vile abiria kuvaa kofia ngumu (helmet), na kwa wanaovaa kofia ziko chini ya kiwango cha usafi ambapo huhatarisha afya za watumiaji. Vile vile, kuna baadhi ya matendo ya uhalifu yakitumia usafiri huo na kupuuza sheria za usalama barabarani.

- (a) Je, Serikali inatambua usafiri wa boda boda kama moja ya vyombo rasmi vya kupakia abiria.
- (b) Je, Askari wa Usalama barabarani wanachukuwa hatua gani kudhibiti vitendo vya uvunjaji wa sheria kwa vyombo vya boda boda
- (c) Suala la afya za watumiaji wa boda boda linazingatiwaje.

### **III. HOJA ZA SERIKALI:**

#### **Waziri wa Fedha na Mipango:**

Kwamba Baraza hili lijadili na kuukubali Mpango wa Maendeleo wa Serikali ya Mapinduzi Zanzibar kwa Mwaka 2017/2018 na lijadili na kuyakubali Makadirio ya Mapato na Matumizi ya Kazi za Kawaida na Maendeleo ya Serikali ya Mapinduzi ya Zanzibar kwa Mwaka 2017/2018.

Zanzibar,  
19 Juni, 2017.

**(Raya Issa Msellem)**  
**KATIBU WA BARAZA.**